

Pisortat suliffeqarfiutaasa ingerlatseqatigiiffiit tamakkiisumik ilaannakoortumilluunniit Namminersorlutik Oqartussanit pigineqartut sorliit namminersortunngorsarneqarsinnaanerit pillugu misissuineq tunngavigalugu nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat kingusinnerpaamik UPA 2020-mi saqqummiunneqassaaq.

(Inatsisartuni ilaasortaq, Steen Lyngge, Demokraatit)

Akissuteqaat

(Naalakkersuisut Siulittaasuat)

1. Oqaluuserineqarnera

Aallarniutigalugu inuiaqatigiisugut suliffeqarfiutitta namminersortunngorsarneqarnissaasa pimoorunneqarnissaa pillugu aalajangiiffigisassatut siunnersuutip saqqummiunneqarneranut Naalakkersuisut qujassuteqarumapput. Namminersorlutik Oqartussat ingerlatseqatigiiffiutaasa namminersortunngorsarneqarnissaat pillugu qulequttap qulaajaaffiginissaanut aalajangiiffigisassatut siunnersuut pitsaasumik pissutissaqalersitsivoq, kisiannili aamma Namminersorlutik Oqartussat ingerlatseqatigiiffiutaanni iluatsittumik namminersor-tunngorsaasoqassappat tunngavissaatitaatut suut pigineqartariaqarnerannik eqqartuinissaq aamma periarfissaavoq.

Ingerlatseqatigiiffinnik Namminersorlutik Oqartussanit pigineqartunik namminersortunngorsaaneq

Aallarniutigalugu ingerlatseqatigiiffiit Namminersorlutik Oqartussanit pigineqartut ataasiakkaat namminersortunngorsarneqarnissaminnut piukkunnarnersut aamma suliffeqarfittut iluitsutut imaluunniit suliffeqarfiup ilaatut namminersortunngorsarneqarnissamut piareersimanersut, ingerlatseqatigiiffinni aqutsisut suleqatigalugit nalilersuineq pisimammat Naalakkersuisut ilisimatitsissutigissavaat. Naliliinerit taakku aningaasaqarnikkut inuiaqatigiinnullu tunngasutigut aallaaveqartinneqarput, pissutsillu taakku piginneqatigiiffimmik ingerlatsinermi malunnaatilimmik allannguisoqassatillugu nalilersuineri tunngaviusariaqartut pingaaruteqarnerpaat ilagaat.

Naalakkersuisooqataasut partiit Inatsisartuni nalunaarutiginiuuat, inuussutissarsiornermik ingerlatsisunut pisortat akuleruttarnerat annikillisinneqassasoq, tamannalu namminersortunngorsaaneq aqutigalugu ingerlanneqassasoq. Innuttaasunillu kiffartuussinerit ajorseriassanngitsut peqatigitillugu piumasarineqarpoq. Namminersorlutik Oqartussat pigisaannik ingerlatseqatigiiffinnik namminersortunngorsaannissamik suliniuteqarneq pillugu Naalakkersuisut naliliiniarnerat anguniakkanit taakkuninnga aallaaveqarpoq.

**Namminersorlutik Oqartussat ingerlatseqatigiiffinnik pigisaanik
namminersortunngorsaaneermik suliaqarneq**

Namminersorlutik Oqartussat ingerlatseqatigiiffinni pigisaanni piginnittuunitsinni pingaartuuvoq, ingerlatseqatigiiffiit ingerlanneqarneranni ineriartornerannilu aalaakkaasunik tunngaveqarnissaq soorlu tamanna ingerlatseqatigiiffinni inunnit namminersortunit pigineqartuni tamanna pisartoq. Taamaattumik ineriartortitsinissamik suliniutit qitiusut pillugit oqaloqatigiinneq ingerlasariaqarpoq, matumani namminersortunngorsaaratarsinnaaneq ilanngullugu, tamannalu ingerlatseqatigiiffinni tamani ataasiakkaani ingerlanneqassaaq piginnittup aqutsisullu akornanni toqqaannartumik. Ingerlatseqatigiiffiit aningaasaqarnikkut inissisimanerat taamatuttaarlu inuiaqatigiinnut naleqarnerat eqqarsaatigalugu tamanna orniginarnerussasoq Naalakkersuisut isumaqarput.

Ingerlatseqatigiiffiit Kalaallit Nunaanni inuiaqatigiinni assigiinngitsunik atuuffeqarput. Tamannalu maluginiassallugu pingaaruteqarpoq. Ilaat niuernermik ammasumik aamma unammilleqatigiiffiusumik ingerlatsipput, allat inatsisit imaluunniit akuersissutit aqutugalugit nalinginnaasumik unammilleqatigiinnerup avataani inuiaqatigiinni suliassanik naammasisassanik isumaginnittarput. Kingulleq taaneqartoq pingaartumik attaveqaateqarnermut tunngassuteqartuni atuuppoq. Ingerlatseqatigiiffiit allaanerit pingajoraat suliffeqarfiit iluanaarniarnissamik anguniagaqanngitsut, allanik pissuteqartumik aktiaateqarluni ingerlatseqatigiiffittut aaqqissuutissallugit tulluarnerusut. Tamanna aallaavigalugu pisariaqarpoq Namminersorlutik Oqartussat ingerlatseqatigiiffiutaannik namminersortunngorsaaneq ataasiakkaat isiniarnerat aallaavigalugu, suliffeqarfimmiit suliffeqarfimmut, ingerlatseqatigiiffiup namminersortunngortinnissaanut pisariaqartitsineq aallaavigalugu isiginiarnissaat.

Oqaatigineqartut aqutugalugit Naalakkersuisut erseqqissaatigerusuppaat, ingerlatseqatigiiffiit Namminersorlutik Oqartussanit pigineqartut namminersortunngorsarneqarnerat tassaammat qulequtaq imartooq aamma suliaq inuiaqatigiinnut annertuutigit kinguneqaateqarsinnaasoq, pitsaasunik pitsaanngitsunillu. Aningaasarsiorneq pillugu suleqatigiiffiup OECD-ip ukiut untritilikkaat 21.-issaanni namminersortunngorsaaneq pillugu nalunaarusiami eqqartornikuuaa, ingerlatseqatigiiffinnik naalagaaffimmit pigineqartunik namminersortunngortitsinermi aningaasaqarnikkut, inuttut aamma inuiaqatigiittut unammilligassat qanoq isumagineqarsinnaanersut. Ataatsimut isigalugu innersuussutit OECD-ip nalunaarutaaniittut Naalakkersuisut taperserpaat.

**Namminersorlutik Oqartussat ingerlatseqatigiiffiit pigisaasa
namminersortunngorsarneqarnerat pillugu nalunaarusiap suliarineqarnera**

Namminersorlutik Oqartussat ingerlatseqatigiiffiit pigisaasa ataasiakkaat, tamakkiisumik ilaannakuusumilluunniit inunnit namminersortunit pigineqalersinnaanerannut tunngatillugu periarfissat ingerlaavartumik nalilersorneqartarnissaat Naalakkersuisut isumaqatigaat. Tamanna aallaavigalugu, aalajangiiffigisassatut siunnersuummi siunertarineqartoq Naalakkersuisut tapersersinnaavaat aamma UPA 2020-p tungaanut Namminersorlutik Oqartussat ingerlatseqatigiiffiit pigisaasa namminersortunngorsarneqarnissaat pillugu nassuiaat Inatsisartunut agguanneqartussaq suliarissavaat.

Taamatut oqaaseqarlunga aalajangiiffigisassatut siunnersuutip saqqummiunneqartup Inatsisartuni oqaluuserineqarnissaa Naalakkersuisut qilanaaraat.